

Ziyoratgohga tashrif

O'zbekiston madaniy boyliklari bilan jahonga mashhur. Uning tarixiy yodgorliklariga dunyo ahli katta qiziqish bildiradi. Birgina Toshkent viloyatining turli hududlarida ko'plab ziyoratgohlar joylashgan va ular doim mahalliy tashrif buyuruvchilar va xorijlik sayyohlar bilan gavjum. Zangiota tumanida joylashgan Zangiota ziyoratgohidan ham odam qadami uzilmaydi. 22-fevral tongida "Gidromelioratsiya" fakulteti 307-guruh talabalari guruh murabbiyi Sanobar Do'stnazarova rahbarligida ushbu muqaddas qadamjoga tashrif uyushtirdilar. Ziyorat avvalida talaba-yoshlar "Zangiota" ziyoratgohining o'tmishi va buguni haqida ma'lumotga ega bo'ldilar.



Toshkent viloyatidagi XV asrga oid me'moriy yodgorlik hisoblangan Zangiota ziyoratgohi nafaqat respublikamizda, balki O'rta Osiyo xalqlari orasida alohida ahamiyatga ega. XII asrning ikkinchi yarmida yashab o'tgan Zangiota, asl ismi Oyxo'ja ibn Toshxo'ja ismli shaxs nomi bilan bog'liq bo'lib, to'q bug'doyrang tusli kishi bo'lganligi sababli odamlar orasida Zangi ota (ya'ni qorachadan kelgan) nomi bilan mashhur bo'lgan. Shayx Arslonbobning to'rtinchi avlodi (evarasi) bo'lgan. O'z davrida Yassaviya tariqati piri murshidi darajasiga ko'tarilgan bu zot Shosh (Toshkent) shahrining Samarqand darvoza mavzesida dunyoga kelgan. U zot o'z ilmi, mehnati, odamiyligi, hikmatlilik va rostgo'ylik fazilatlarini bilan dong taratgan bo'lib, o'z davrining rivojiga ulkan hissa qo'shgan bobokalonlarimizdan biridir.



Tarixda Zangiota maqbarasining bunyod etilishi haqida ajabtovur rivoyatlar mavjud. Sohibqiron bobomiz Amir Temur Turkistonga borib, u yerda Xoja Ahmad Yassaviyning muborak qabrlarini ziyorat qiladilar. So'ng bu yerda maqbara qurishga farmon beradilar. Lekin, nima uchundir ish hadeganda yurishavermaydi. Ana shunday kunlarning birida Sohibqiron tush ko'radi. Tushida nuroniy bir zot: Ey Amir, maqbarani avval Zangi otaga qurgin, so'ng Yassaviyga qurursan deydi. Shundan so'ng Amir Temur Zangi ota o'tgan maskanni ziyorat qilib, maqbara qurilishini boshlaydi. Bu muhtasham yodgorlik majmui keyinchalik Sohibqironning nabirasi ulug' olim va arbob Mirzo Ulug'bek tomonidan nihoyasiga yetkaziladi. Sobiq tuzum davrida deyarli xaroba holiga keltirilgan bu yodgorlik majmui so'nggi yillarda qayta tiklandi. Yangi qurilishlar amalga oshirildi, bog' barpo etildi. Endilikda nafaqat mamlakatimizdan, balki xorijdan ham yuzlab kishilar "Zangiota" maqbarasini ziyorat qilishga kelmoqdalar. Talabalar esa ko'tarinki ruh va xush kayfiyat bilan ziyoratni yakunladilar.

TIQXMMI matbuot xizmati